

重刊巢氏諸病源候總論

十三



婦人雜病諸候 一 凡三十二論

風虛勞冷候

風虛勞冷者是人體虛勞而受於冷也夫人將攝順理則血氣調和風寒暑熱不能為害若勞傷血氣便致虛損則風冷乘虛而干之或客於經絡或入於腹內其經絡得風冷則氣血冷澀不能自溫於肌膚也腹內得風冷則脾胃弱不消飲食也隨其所傷而變成病若大腸虛者則變下利若風冷入於子臟則令臟冷致使無兒若搏於血則血澀壅亦令經水不利斷絕不通

風邪驚悸候

風邪驚悸者是為乘於心故也心藏神為諸藏之主若血氣調和則心神安定若虛損則心神虛弱致風邪乘虛干之故驚而悸動不定也其驚悸不止則變恍惚而憂懼

虛汗候

人以水穀之精化為血氣津液津液行於腠理若勞傷損動陽氣外虛腠理開血氣衰弱故津液洩越冷多汗也其虛汗不止則變短氣柴瘦而羸瘠也亦令血脉減損經水不澀甚者閉斷不通也

中風候

中風者虛風中於人也風是四時八方之氣常以冬至之日候其八方之風從其鄉來者主長養萬物若不從其鄉來名為虛風則害萬物人體虛者則中之當時雖不即發停在肌膚後或重傷於風前後重否因體虛則發人腑臟俞皆在背

得傾側汗出若唇赤汗流者可治急灸心俞百壯若唇或青或白或黃或黑此是心壞為水面目平而時悚動皆不復可治五六日而死若肝中風踞坐不得位頭若遠兩目連額上色微有青者唇青而面黃可治急灸肝俞百壯若大青黑面一黃一白者是肝已傷不可復治數日而死若脾中風踞而腹滿身通黃吐鹹水汗出者可治急灸脾俞百壯若手足青者不可復治腎中風踞而腰痛視脇左右未有黃色如餅糲大者可治急灸腎俞百壯若齒黃亦鬢髮直而土色不可復治肺中風側卧而背滿短氣冒悶汗出視目下鼻上下兩邊下行至口色白可治急灸肺俞百壯若色黃為肺已傷化為血而不可復治其人當妄掇空自拈衣此亦數日而死

中風口噤候

中風口噤是體虛受風風入頷頰夾口之筋也手三陽之筋結入於頷頰足陽明之筋上夾於口而風挾冷乘虛而入其筋則筋攣故引牙關急而口噤

角弓反張候

角弓反張是體虛受風風入諸陽之經也人陰陽經絡周環於身風邪乘虛入諸陽之經則腰背反折攣急如角弓之狀

偏風口喎候

偏風口喎是體虛受風風入於交口之筋也足陽明之筋上夾於口其筋偏虛而風因乘之使其經筋偏急不調故令口喎僻也

賊風偏枯候

賊風偏枯是體偏受風風客於半身也人有勞傷血氣半身偏虛者風乘虛入客為偏風也其風邪入深真氣去邪氣著則為偏枯此由血氣衰損為風所客令血氣不相周榮於肌

肉故令偏枯也

風眩候

風眩是體虛受風風入於腦也諸腑臟之精皆上注於目其血氣與脈并上屬於腦循脈引於目系目系急故令眩也其眩不止風邪甚者變癩倒為癩疾

癩狂候

癩者卒發仆地吐涎沫口喎目急手足繚矣無所覺知良久乃甦狂者或言語倒錯或自高賢或罵詈不避親疎亦有自定之時皆由血氣虛受風邪所為入稟陰陽之氣而生風邪入并於陰則為癩入并於陽則為狂陰之與陽更有虛有實隨其虛時為邪所并則發故發癩又發狂又在胎之時其母卒大驚動精氣并居亦令子發癩此則小兒而發癩者是非關長因血氣虛損受風邪所為又有五癩一曰陽癩二曰陰

名京世七

三

癩三曰風癩四曰濕癩五曰勞癩此蓋隨其感風之由立名又有牛馬猪雞狗之癩皆死其癩發之時聲形狀似於牛馬等故以為名也俗云病癩人忌食六畜之肉食者癩發之狀皆悉象之

風瘙痒候

風瘙痒者是體虛受風風入腠理與血氣相搏而俱往來在於皮膚之間邪氣微不能衝擊為痛故但瘙痒也

風蠱候

風蠱者由體虛受風風在皮膚之間其狀淫淫躍躍若蠱物刺一身盡痛侵傷血氣動作如蠱毒之狀謂之風蠱

癩候

癩病是賊風入百脉傷五臟連注骨髓俱傷而發於外使眉睫墮落皮肉生瘡筋爛節斷語聲嘶破而毒風之變冷熱不

同故腠理發癩形狀亦異

氣候

氣病是肺虛所為肺主氣五臟六腑皆稟氣於肺憂思恐怒居處飲食不節傷動肺氣者並成病其氣之病有虛有實其肺氣實謂之有餘則喘逆上氣其肺氣虛謂之不足則短乏少氣而有冷有熱熱則四肢煩熱也冷則手足逆冷

心痛候

心痛是臟虛受風風冷邪氣乘於心也其痛發有死者有不死成痼者心為諸臟主而藏神其正經不可傷傷之而痛者名為真心痛朝發夕死夕發朝死心之肢別絡為風冷所乘而痛者故痛發乍間乍甚而成痼也

心腹痛候

心腹痛者腑臟虛弱風邪客於其間與真氣相擊故痛其痛隨氣下上或上衝於心或下攻於腹故心腹痛

腹中痛候

腹痛者由臟腑虛弱風冷邪氣乘之邪氣與正氣相擊則腹痛也

小腹痛候

小腹痛者此由胞絡之間宿有風冷搏於血氣停結小腹因風虛發動與血相擊故痛

月水不調候

婦人月水不調由勞傷氣血致體虛受風冷風冷之氣客於胞內傷衝脉任脉損手太陽少陰之經也衝任之脉皆起於胞內為經絡之海手太陽小腸之經手少陰心之經此二經為表裏主上為乳汁下為月水然則月水是經絡之餘若冷熱調和則衝脉任脉氣盛太陽少陰所主之血宣流以時而

下若寒溫耗適經脈則虛有風冷乘之邪搏於血或寒或溫  
寒則血結溫則血消故月水乍多乍少為不調也診其脾脈  
沈沈而喘浮之而虛若腸脹煩滿胃中有熱不嗜食食不化  
大便難四支苦痺時不仁得之房內月事不來來而併又少  
陰脈澀則血不來此為居經三月一來又脈微血氣俱虛年  
少者亡血之脈也乳子下利為可不調者此為居經亦三月  
一來又經水一月再來者經來時其脈欲自如常而反微者  
不利不汗出者其經二月必來  
養生方云病憂恚泣哭以令陰陽結氣不和故令月水時少  
時多內熱苦渴色惡體肌枯身重

月水不利候

婦人月水不利者由勞傷血氣致令體虛而受風冷風冷客  
於胞內損傷衝任之脈手太陽少陰之經故也衝脈任脈之

海皆起於胞內手太陽小腸之經也手少陰心之經也此二

五

經為表裏主下為月水風冷客於經絡搏於血氣血得冷則  
壅滯故令月水來不宣利也診其脈從寸口邪入上者名曰  
解脈來至狀如琴絃苦小腹痛經月不利孔竅生瘡又左手  
關上脈足厥陰經也沈為陰陰虛者主月經不利腰腹痛尺  
脈滑血氣實經絕不利又脈左手尺來而斷絕者月水不利  
也又脈寸關調如故而尺脈絕不至者月經不利當患小腹  
引腰絞痛氣積聚上以胃脇

月水來腹痛候

婦人月水來腹痛者由勞傷血氣以致體虛受風冷之氣客  
於胞絡損衝任之脈手太陽少陰之經衝脈任脈皆起於胞  
內為經脈之海也手太陽小腸之經手少陰心之經也此二  
經共為表裏主下為月水其經血虛受風冷故月水將下之

際血氣動於風冷風冷與血氣相擊故令痛也

月水不斷候

婦人月水不斷者由指傷經血衝脉任脉虛損故也衝任之脉爲經脉之海手太陽小腸之經也手少陰心之經也此二經爲表裏主下爲月水勞傷經脉衝任之氣虛損故不能制其經血故令月水不斷也凡月水不止而合陰陽冷氣上入藏令人身體面目萎黃亦令絕子不產也

月水不通候

婦人月水不通者由勞損血氣致令體虛受風冷風冷邪氣客於胸內傷損衝任之脉并手太陽少陰之經致胞絡內絕血氣不通故也衝任之脉起於胞內爲經脉之海手太陽小腸之經也手少陰心之經也此二經爲表裏主下爲月水風冷傷其經血血性得溫則宜流得寒則澀閉既爲冷所結搏

婦人月水不通候

六

血結在內故令月水不通

又云腸中鳴則月事不來病本

於胃所以然者風冷干於胃氣胃氣虛不能分別水穀使津液不生血氣不成故也

又云醉以入房則內氣竭絕傷肝

使月事衰少不來也所以爾者肝藏於血勞傷過度血氣枯竭於內也又先經唾血及吐血下血謂之脫血使血枯亦月事不來也又利血經水亦斷所以爾者津液減耗故也利止津液生其經自下診其腎脉微澀爲不利者是月水不來也又左手關後尺內浮爲陽絕者無膀胱脉也月事則閉又肝脉沈之而急浮之亦然時小便難苦頭眩痛腰背痛足爲寒時夜月事不來時恐得之少之時有所墮墜也月水不通久則血結於內生塊變爲血瘕亦作血癥血水相并壅澀不宣通脾胃虛弱變爲水腫也所以然者脾候身之肌肉象於土土主能剋消於水水血既并脾氣衰弱不能剋消故水氣流



溢浸漬肌肉故腫滿也

帶下候

帶下者由勞傷過度損動經血致令體虛受風冷風冷入於胞絡搏其血之所成也衝脈任脈為經絡之海任之為病女子則帶下而手太陽為小腸之經也手少陰心之經也心為藏主於裏小腸為府主於表此二經之血在於婦人上為乳汁下為月水衝任之所統也衝任之脈既起於胞內陰陽過度則傷胞絡故風邪乘虛而入於胞損衝任之經傷太陽少陰之血致令胞絡之間穢液與血相兼帶帶而下冷則多白熱則多赤故名帶下又帶有三門一曰胞門二曰龍門三曰玉門已產屬胞門未產屬龍門未嫁屬玉門又未嫁女亦有三病一者經水初下陰內熱或當風或因扇得冷二者或因以寒水洗之得又三者或見月水初下驚恐得病皆屬帶下

婦人年五十

七

也又婦人年五十所病下利數十日不止暮發熱小腹裏急痛腹滿手掌熱煩唇口乾燥此因曾經半產瘀血在小腹不去此疾必帶下所以知瘀血者唇口燥即是其證又婦人年五十所病但若背痛時時腹中痛少食多厭診其脈陽微關尺小緊形脈不相應病如此在下焦此必帶下又婦人帶下六極之病脈浮即腸鳴腹滿脈緊即腸中痛脈數則陰中痒痛生瘡脈弦即陰疼掣痛

帶五色俱下候

帶下病者由勞傷血氣損動衝脈任脈致令其血與穢液兼帶而下也衝任之脈為經脈之海經血之行內榮五臟五臟之色隨藏不同傷損經血或冷或熱而五藏俱虛損者故其色隨穢液而下為帶五色俱下

帶下青候

此由勞傷血氣損動衝脈任脈衝任之脈皆起於胞內為經  
脈之海手太陽小腸之經也手少陰心之經也此二經主下  
為月水若經脈傷損衝任氣虛不能約制經血則與穢液相  
兼而成帶下然五臟皆稟血氣其色則隨臟而不同肝藏之  
色青帶下青者是肝臟虛損故帶下而挾青色

帶下黃候

勞傷血氣損動衝脈任脈衝任之脈皆起於胞內為經脈之  
海手太陽小腸之經也手少陰心之經也此二經主下為月  
水若經脈傷損衝任氣虛不能約制經血則血與穢液相兼  
而成帶下然五臟皆稟血氣其色則隨臟而不同脾藏之色黃  
帶下黃者是脾藏虛損故帶下而挾黃色

帶下赤候

勞傷血氣損動衝脈任脈衝任之脈皆起於胞內為經脈之海  
手太陽小腸之經也手少陰心之經也此二經主下為月水  
若經脈傷損衝任氣虛不能約制經血則與穢液相兼而成  
帶下然五臟皆稟血氣其色則隨臟而不同心藏之色赤帶下  
赤者是心臟虛損故帶下而挾赤色

帶下白候

勞傷血氣損動衝脈任脈衝任之脈皆起於胞內為經脈之  
海手太陽小腸之經也手少陰心之經也此二經主下為月  
水若經脈傷損衝任氣虛不能約制經血則血與穢液相兼  
而成帶下然五臟皆稟血氣其色則隨臟而不同肺藏之色白  
帶下白者肺臟虛損故帶下而挾白色也

帶下黑候

勞傷血氣損動衝脈任脈衝任之脈皆起於胞內為經脈之  
海手太陽小腸之經也手少陰心之經也此二經主下為月

水若經脈傷損衝任氣虛不能約制經血則血與穢液相兼而成帶下然五臟皆稟血氣其色則隨臟不同腎臟之色黑帶下黑者是腎臟虛損故帶下而挾黑色也

帶下月水不利候

帶下之病由勞傷血氣損動衝脈任脈衝任之脈起於胞內為經脈之海經血傷損故血與穢液相兼而成帶下帶下輸瀉則臟虛而重被風冷乘之入傷手太陽少陰之經則使月水不利所以爾者手太陽小腸之經也為腑主表手少陰心之經也為臟主裏此二經共合其經血上為乳汁下為月水血性得寒則澀既為風冷所乘故帶下而血澀所以月水不利也

帶下月水不通候

帶下之病由勞傷血氣損動衝脈任脈衝脈任脈起於胞內

九

為經脈之海經血傷損故血與穢液相兼而成帶下帶下輸瀉則臟虛而重被風冷乘之入傷手太陽少陰之經則使月水不通所以爾者手太陽小腸之經也為腑主表手少陰心之經也為臟主裏此二經共合其經血上為乳汁下為月水血性得寒則澀既為風冷所乘冷氣沈積故血結壅所以帶下月水不通凡月水不通血結積聚變成血瘕血瘕亦變面目浮腫也

婦人雜病諸候 二 凡一十九論

漏下候

漏下者由勞傷血氣衝任之脈虛損故也衝脈任脈為十二經脈之海皆起於胞內而手太陽小腸之經也手少陰心之經也此二經主上為乳汁下為月水婦人經脈調適則月水以時若勞復者以衝任之氣虛損不能制其經脈故血非時而下淋瀝不斷謂之漏下也診其寸口脈弦而大弦則為藏大則為乳藏即為寒乳即為虛寒乳相搏其脈為牢婦人即半產而下漏又尺寸脈虛者漏血漏血脈浮不可治也

養生方云懷娠未滿二月服藥自傷下血下血未止而合陰陽邪氣結因漏治不止狀如腐肉在於子臟令內虛

漏五色俱下候

漏下之病由勞傷血氣衝任之脈虛損故也衝脈任脈為經脈之海起於胞內手太陽小腸之經也手少陰心之經也此二經之血主上為乳汁下為月水衝任之脈虛損不能約制其經血故血非時而下淋瀝成漏也五臟皆稟血氣虛則淋瀝漏致五臟傷損五臟之色隨臟不同若五臟皆虛損者則漏五色隨血而下診其尺脈急而弦大者風邪入少陰女子漏白下赤又漏下赤白不止脈小虛滑者生脈大緊實數者死也又漏血下赤白日下血數斗脈急疾者死遲者生養生方云夫婦自其諍訟訟意未和平強從子臟閉塞留結為病遂成漏下黃白如膏

漏下青候

勞傷血氣衝脈任脈虛損衝任之脈皆起於胞內為經脈之

海手太陽小腸之經也手少陰心之經也此一經主下為月水傷損經血衝任之氣虛故血非時而下淋瀝不斷而成漏下五臟皆稟血氣肝臟之色青漏下青者是肝臟之虛損故漏下而挾青色也

漏下黃候

勞傷血氣衝任之脉皆起於胞內為經脉之海手太陽小腸之經也手少陰心之經也此一經主下為月水傷損經血衝任之氣虛故血非時而下淋瀝不斷而成漏下五臟皆稟血氣脾臟之色黃漏下黃者是脾臟之虛損故漏下而挾黃色也

漏下赤候

勞傷血氣衝脉任脉皆起於胞內為經脉之海手太陽小腸之經也手少陰心之經也此一經者主下為月水傷損經血衝任之氣虛故血非時而下淋瀝不止而成漏下五臟皆稟血氣心臟之色赤漏下赤者是心臟之虛損故漏下而挾赤色也

漏下白候

勞傷血氣衝任之脉皆起於胞內為經脉之海手太陽小腸之經主下為月水傷損經血衝任之氣虛故血非時而下淋瀝不斷而成漏下五臟皆稟血氣肺臟之色白漏下白者是肺臟之虛損故漏下而挾白色也

漏下黑候

勞傷血氣衝任之脉皆起於胞內為經脉之海手太陽小腸之經也手少陰心之經也此一經主下為月水傷損經血衝任之氣虛故血非時而下淋瀝不斷而成漏下五臟皆稟血氣腎臟之色黑漏下黑者是腎臟之虛損故漏下而挾黑色也

也

崩中候

崩中者腑臟傷損衝脈任脈血氣俱虛故也衝任之脈為經脈之海血氣之行外循經絡內榮腑臟若無傷則腑臟平和而氣調適經下以時若勞動過度致腑臟俱傷而衝任之氣虛不能約制其經血故忽然暴下謂之崩中診其寸口脈微遲尺脈微於寸寸遲為寒在上焦但吐耳今尺脈遲而弦如此小腸痛腰痛者必下血也

白崩候

白崩者是勞傷胞絡而氣極所為肺主氣氣極則肺虛冷也肺臟之色白虛冷勞極其色與胞絡之間穢液相挾崩傷而下為白崩也

崩中五色俱下候

崩中之病是傷損衝任之脈衝任之脈皆起於胞內為經脈之海勞傷過度衝任氣虛不能統制經血故忽然崩下謂之崩中五臟皆稟血氣五臟之色隨臟不同傷損之人五臟皆虛者故五色隨崩俱下其狀白崩形如涕赤崩形如紅汁黃崩形如爛瓜汁青崩形如藍色黑崩形如乾血色

崩中漏下候

崩中之狀是傷損衝任之脈衝任之脈皆起於胞內為經脈之海勞傷過度衝任氣虛不能約制經血故忽然崩下謂之崩中崩而內有瘀血故時崩時止淋瀝不斷名曰崩中漏下

崩中漏下五色候

崩中之病是勞傷衝任之脈衝任之脈起於胞內為經脈之海勞傷過度衝任氣虛不能統制經血故忽然崩下謂之崩中而有瘀血在內遂淋瀝不斷謂之漏下漏下不止致損於

五臟五臟之色隨臟不同因虛而五色與血俱下其狀白者如涕赤者如紅汁黃者如爛瓜汁青者如藍色黑者如乾血色相雜雜而下也

### 積聚候

積者五臟所積聚者六腑所成五臟之氣積名曰積六腑之氣聚名曰聚也積痛不離其部聚者其痛無有常處皆由陰陽不和風冷搏於臟腑而生積聚也婦人病積經久則令無子亦令月水不通所以然者積聚起於冷結入子臟故令無子若冷氣入於胞絡冷搏於血血冷則澁結故令月水不通

### 癖病候

癖病者由冷氣結聚飲食不消停積於脅下則成癖病其狀弦急刺痛得冷則發作也

### 疝瘕候

疝瘕之病由飲食不節寒溫不調氣血勞傷臟腑虛弱受於風冷令人腹內與血氣相結所生疝者痛也瘕者假也其結聚浮假而痛推移而動婦人病之有異於丈夫者或因產後臟腑受寒或因經水往來取冷過度非獨關飲食失節多挾有血氣所成也診婦人疝瘕其脈弦急者生虛弱小者死又尺脈瀦而浮牢為血實氣虛也其發腹痛逆滿氣上行此為婦人胞中絕傷有惡血久成結瘕得病以冬時來其鼻則赤

### 癥痞候

癥痞者由冷熱不調飲食不節積在腹內或腸胃之間與臟相結搏其牢強推之不移名曰癥言其病形徵可驗也氣壅塞為痞言其氣痞澁不宣暢也皆得冷則發動刺痛癥痞之病其形冷結若冷氣入於子臟則使無子若冷氣入於胞絡搏於血氣血得冷則澁令月水不通也

八瘕候

八瘕者皆胞胎生產月水往來血脉精氣不調之所生也腎  
為陰主開閉左為胞門右為子戶主定月水生子之道胞門  
子戶主子精神氣所出入合於中黃門玉門四邊主持關元  
禁閉子精臍下三寸名曰關元主藏魂魄婦人之胞三焦之  
府常所從止然婦人經脈俞絡合調則月水以時來至故能  
生子而無病婦人榮衛經絡斷絕不通邪氣便得往入合於  
臟若生血未盡而合陰陽即令婦人血脉攣急小腹重急支  
滿習脅腰背相引四支酸痛飲食不調結牢惡血不除月水  
不時或月前月後因生積聚如懷胎狀邪氣甚盛者令人恍  
惚多夢寒熱四肢不欲動陰中注氣腫内生風甚者害小便  
瀝瀝而痛淋瀝面黃黑成病則不復生子其八瘕者黃瘕青  
瘕燥瘕血瘕脂瘕狐瘕蛇瘕蠃瘕也 黃瘕者婦人月水始

為常身八

五

下若新傷墮血氣未止卧寤未定五臟六腑虛羸精神不治  
因以當向大風便利陰陽開闔節四邊中於濕風氣從下上  
入陰裏稽留不去名為陰陽虛則生黃瘕瘕之聚令人苦四  
肢寒熱身重淋露不欲食左脅下有血氣結牢不可得而抑  
苦腰背相引痛月水不利令人不產小腹下陰中如刀刺不  
得小便時苦寒熱下赤黃病令人無子 青瘕者婦人新產  
未滿十日起行以澆洗太早陰陽虛玉門四邊皆解散子戶  
未安骨肉皆痛手臂不舉飲食未復內藏吸吸又當風臥不  
自隱蔽若居濕席令人苦寒洒洒入腹煩悶沈淖惡血不除  
結執不得前後便化生青瘕瘕聚左右脅藏於背脊上與髀  
髀腰下攣兩足腫面目黃大小便難其後月水為之不利  
或不復禁狀如崩中此自其過所致令人少子 燥瘕者婦  
人月水下惡血未盡其人虛憊而已夏月熱行疾走若舉重



移輕汗出交流氣力未平而率以急悉以喜致猥咽不洩經  
脈攣急內結不舒煩滿少氣上達胃鬲背脊小腹為急月水  
與氣俱不通而反以飲清水快心月水橫流衍入他臟不去  
有熱因生燥瘵之聚大如半杯上下腹中苦痛還兩脅上下  
引心而煩害飲食欲吐胃及腹中不得大息腰背重喜臥血  
汗足酸疼痛久立而痛小便失時居然自出若失精月水閉  
塞六便難病如此者其人少子 血瘵病婦人月水新下未  
滿日數而中止飲食過度五穀氣盛溢入他臟若大飢寒汲  
汲不足呼吸未調而自勞血下未定左右走腸胃之間留絡  
不去內有寒熱與月水合會為血瘵之聚令人腰痛不可以  
俛仰橫骨下有積氣牢如石小腹裏急苦痛背脊疼深達腰  
腹下攣陰裏若生風冷子門擗月水不時下來乍不來此病  
令人無子 脂瘵者婦人月水新來若生未滿三十日以合

多身身分 六

陰陽絡脈分胞門傷子戶失禁開即散五臟六腑津液流行  
陰道騫動百脈閏樞四解外不見其形子積與血氣相遇犯  
禁子精化不足成子則為脂瘵之聚令人支滿裏急痛疾痺  
引小腹重腰背如刺狀四肢不舉飲食不甘臥不安席左右  
走腹中切痛時瘥時甚作者少氣頭眩身體解以苦寒惡風  
膀胱脹月水乍來乍去不如常大小便血不止如此者令人  
無子 狐瘵者婦人月水當日數來而反悲哀憂恐以遠行  
逢暴風疾雨雷電驚恐衣被沈濕疲倦少氣心中怳怳未定  
四肢懈惰振寒厥氣絕精神遊亡胞氣入於陰裏不去生狐  
瘵之聚食人臟令人月水閉不通小腹疼與胃脅腰背痛陰  
中腫小便難胞門子戶不受男精五臟氣盛令人嗜食欲嘔若  
睡多所思如有娠狀四肢不舉有此病者終身無子其瘵有  
手足成形者殺人也未成者可治 蛇瘵者婦人月水已下

新止適閉未復胞門子戶勞傷陰陽未平復榮衛分行若其中風暴病羸劣飲食未調若已起當風行厥度泥塗用清寒太早若坐濕地名陰陽亂腹中虛且未飲食若遠道之餘汚井之水不潔之食吞蛇鼠之精留絡不去因生蛇瘕之聚上食心肝長大其形若漆在臍上下還疔左右脅不得氣兩股脛間若漆疾小腹狀小便赤黃膀胱引陰中攣腰目痛難以動作苦寒熱之後月水有多有少有此病者不復生子其手足成形者殺人未成者可治 蠶瘕者婦人月水新至其人劇吐疲勞衣服沈濕不以時去若當風睡兩足踐濕地恍惚覺悟蹠立未安顏色未平復見所好心為開竅魄感動五內脫消若以入水浣洗沐浴不以時出神不守水精與邪氣俱入至上三焦之中募玉門先開津液妄行留絡不去因生蠶瘕之聚大如小盤令人小腹切痛痛惡氣走上下腹中苦痛

為身身八丁

七

若存若亡持之躍手不利陰裏腰背亦痛不可以息月水喜敗不通面目黃黑脫聲少氣有此病者令人絕子其瘕有手足成形者殺人未成者可治

帶下三十六疾候

諸方說三十六疾者是十二癥九痛七害五傷二固謂之三十六疾也十二癥者是所下之物一者如膏二者如青血三者如紫汁四者如赤皮五者如膿六者如豆汁七者如葵羹八者如凝血九者如清血血似水十者如米汁十一者如月浣十二者經度不應期也 九痛者一者陰中痛傷二者陰中淋痛三者小便即痛四者寒冷痛五者月水來腹痛六者考氣滿並痛七者汁出陰中如蟲嚙痛八者脅下皮痛九者腰痛 七害者一者害食二者害氣三者害冷四者害勞五者害房六者害妊七者害睡 五傷者一者窮孔痛二者中

寒熱痛三者小腹急牢痛四者藏不仁五者子門不止引背  
痛 二固者一者月水閉塞不通其餘二固者文闕不載而  
張仲景所說二十六種疾皆由于臟冷熱勞損而挾帶下起  
於陰內條目混漫與諸方不同但仲景義最玄深非愚淺能  
解恐其文雖異其義理實同也

無子候

婦人無子者其事有二也一者墳墓不祀二者夫婦年命相  
剋二者夫病婦疹皆使無子其若是墳墓不祀年命相剋此  
二者非藥能益若夫病婦疹須將餌故得有效也然婦人挾  
疾無子皆由勞傷血氣冷熱不調而受風寒客於子宮致使  
胞內生病或月經澁閉或崩血帶下致陰陽之氣不和經血  
之行乖候故無子也診其右手關後尺脈浮則為陽陽脈絕  
無子也又脈微澁中年得此為絕產也少陰脈如浮緊則絕

產惡寒脈尺寸俱微弱則絕嗣不產也其湯熨針石別有正  
方補益吐納今附於後

養生方云月初出時日入時向月正立不息八通仰頭吸月  
光精八咽之令人陰氣長婦人吸之陰氣益盛子道通陰氣  
長益精髓腦少小者婦人至四十九已上還生子斷緒者即  
有子父行不已即成仙矣

婦人雜病諸候 三 凡四十論

月水不利無子候

月水不利而無子者由風寒邪氣客於經血則令月水否澀血結子臟陰陽之氣不能施化所以無子也

月水不通無子候

月水不通而無子者由風寒邪氣客於經血夫血得溫則宣流得寒則凝結故月水不通冷熱血結搏子臟而成病致陰陽之氣不調和月水不通而無子也月水久不通非止令無子血結聚不消則變為血瘕經久盤結成塊亦作血瘕血水相并津液壅澀脾胃衰弱者水氣流溢變為水腫如此難可復治多致弊人

養生方云少時若新產後急帶舉重子陰挺出或傾邪月水不瀉陰中激痛下塞令人無子

子臟冷無子候

子臟冷無子者由將攝失宜飲食不節乘風取冷或勞傷過度致風冷之氣乘其經血結於子臟子臟則冷故無子

帶下無子候

帶下無子者由勞傷於經血經血受風邪則成帶下帶下之病曰沃與血相兼帶而下也病在子臟胞內受邪故令無子也診其右手關後尺中脉浮為陽陽絕者無子力脉也苦足逆冷帶下故也

結積無子候

五臟之氣積名曰積藏積之生皆因飲食不節當風取冷過度其子臟勞傷者積氣結搏於子臟致陰陽血氣不調和故

病結積而無子

養生方云月水未絕以合陰陽精氣入內令月水不節內生積聚令絕子不復產乳

數失子候

婦人數失子者或由乖陰陽之理或由觸犯禁忌既產之後而數失兒乃非附臟生病故可以方術防斷之也

腹滿少氣候

腹滿少氣者由臟虛而觸風冷風冷搏於血氣故腹滿腹滿則氣壅在內而呼吸不足常如少氣之故故云少氣腹滿也

胃脅脹滿候

胃脅脹滿者由勞傷體虛而風冷之氣乘之客於臟腑腸胃之間搏於血氣血氣壅之不宣氣得冷則逆與血飲相搏上搶胃脅所以令胃脅脹滿也

客熱候

二

客熱候

人血氣有陰陽臟腑有虛實實則生熱虛則受寒互相乘加此人身內陰陽冷熱自相乘也此云客熱者是體虛而將溫過度外熱加之非附臟自生故云客熱也其狀上焦胃鬲之間虛熱口燥或手足煩熱腸胃之內無實熱也

煩滿候

煩滿者由體虛受邪使氣血相搏而氣逆上乘於心胃氣否不宣故令煩滿煩滿者心煩胃間氣滿急也

身體卒痛候

身體卒痛者由勞動血氣而體虛受於風冷客其經絡邪氣與止氣交擊於肌肉之間故身體卒痛也

左脅痛如刀刺候

左脅偏痛者由經絡偏虛邪故也人之經絡循環於身左右

表裏皆周徧若氣血調和不生虛實邪不能傷偏虛者偏受風邪今此云脅痛者左邊偏受病也但風邪在於經絡與血氣相乘交爭衝擊故痛發如刀刺

### 痰候

痰者由水飲停積在於胃鬲所成人皆有痰少者不能為害多則成患但胃鬲飲漬於五臟則變令眼痛亦令目眩頭痛也

### 嗽候

嗽者肺傷微寒故也寒之傷人先傷肺者肺主氣候皮毛故寒客皮毛先傷肺也其或寒微者則效嗽也

### 咽中如炙肉嚮候

咽中如炙肉嚮者此是胃鬲痰結與氣相搏逆上咽喉之間結聚狀如炙肉之嚮也

### 喉痛候

喉痛者風熱毒客於其間故也十二經脈有循頰喉者五臟在內而經脈循於外臟氣虛則經絡受邪邪氣搏於藏氣則生熱熱禾其脈熱搏咽喉故令喉痛也

### 癭候

癭病者是氣結所成其狀頸下及皮寬臃臃然憂恚思慮動於腎氣腎氣逆結宕所生又諸山州縣人飲水多者沙搏於氣結頸下亦成癭也

### 吐血候

吐血者皆由傷損腑臟所為夫血外行經絡內榮腑臟若傷損經絡臟腑則壅血行失其常理氣逆者吐血又怒則氣逆甚則嘔血然憂思驚怒內傷腑臟氣逆上者皆吐血也

### 口舌出血候

舌出血者心脾傷損故也脾氣通於口心氣通於舌而心  
主血脈血榮於臟腑通於經絡若勞損臟腑傷動經脈隨其  
所傷之經虛者血則妄行然口舌出血心脾二臟之經傷也

### 汗血候

汗血者肝心二臟虛故也肝藏血而心主血脈心之液為汗  
肝是木心是火母子也血之行內在腑臟外通經絡勞傷肝  
心其血脈虛者隨液發為汗而出也

### 金瘡敗壞候

婦人金瘡未瘥而交會動於血氣故令瘡敗壞

### 耳聾候

耳聾風冷傷於腎腎氣通於耳勞傷腎氣風客之邪與止氣  
相搏使經氣不通故耳聾也

### 耳聾風腫候

耳聾風腫者風邪搏於腎氣故也腎氣通於耳邪搏其經血  
氣壅澀不得宣發故結腫也

### 眼赤候

眼皆赤者風冷客於腎間與血氣相搏而淚液乘之挾熱者  
則令皆赤

### 風眩鼻塞候

風眩而鼻塞者風邪乘腑臟入於腦也五臟六腑之精氣皆  
上注於目血與氣并屬於腦體虛為風邪入腦則引目目系  
急故令頭眩而腦臟皆受氣於肺肺主氣外候在鼻風邪入  
腦又搏肺氣故頭眩而鼻塞

### 鼻衄候

鼻衄者由傷動血氣所為五臟皆稟血氣血氣和調則循經  
經絡不澀不凝若勞傷損動因而生熱氣逆流溢入鼻者則

成鼻衄也

面黑奸候

面黑奸者或臟腑有痰飲感皮膚受風邪皆令血氣不調致生黑奸五臟六腑十二經血皆上於面夫血之行俱榮表裏人或痰飲漬藏或痿痺受風致血氣不和或澀或濁不能榮於皮膚故變生黑奸若皮膚受風水治則痿痺臟有飲內療方愈也

面黑子候

面黑子者風邪搏血氣變化所生夫人血氣充盛則皮膚潤悅若虛損疰疢變生黑子者是風邪變其血氣所生若生而有之者非藥可治也

蛇皮候

蛇皮者由風邪客於腠理也人腠理受於風則閉密使血氣澀濁不能榮潤皮膚斑剥其狀如蛇鱗世呼蛇體也亦謂之蛇皮也

手逆腫候

手逆腫者經脈受風邪血氣否澀也十二經筋脈有起手心者其經虛風邪客之使血氣否澀皮膚腫枯剥逆起謂之逆

白秃候

頭瘡有蟲啣白而髮秃落謂之白秃二食是人腹內九蟲內此蟲值血氣虛發動所作也

耳後附骨離候

附骨離是風寒搏血脈入深近附於骨也十二經之筋脈有絡耳後完骨者虛則風寒客之寒氣折血血否澀不通深附於骨而成離也其狀無頭但腫痛

腫滿水氣候



水病由體虛受風濕入皮膚搏津液津液否澀雍滯在內不消而流溢皮膚所以然者腎主水與膀胱合膀胱為津液之府津液不消則水停蓄其外候目下如臥蠶頸邊人迎脈動甚也脾為土主剋水而脾候肌肉腎水停積脾土衰微不能消令水氣流溢浸漬皮膚而腫滿

血分候

血分病者是經血先斷而後成水病以其月水壅澀不通經血分而為水故曰血分婦人月經通流則水血消化若風寒搏於經脈血結不通血水而蓄積成水腫病

卒腫候

夫腫或風冷或水氣或熱毒此卒腫由腠理虛而風冷搏於血氣壅結不宣故卒然而腫其狀但結腫而不熱是也

赤流腫候

身及身九丁

六

赤流腫者由體虛腠理開而風熱之氣客之風熱與血氣相搏挾熱毒其狀腫起色赤隨氣流行移易故云流腫

瘀血候

此或月經否澀不通或產後餘穢未盡因而乘風取涼為風冷所乘血得冷則結成瘀也血瘀在內則時時體熱面黃瘀久不消則變成積聚癥瘕也

傷寒候

此謂人觸冒於寒氣而成病冬時嚴寒攝衛周密者則寒不能傷人若辛苦勞役汗出觸冒寒氣即發成病謂之傷寒也其輕者微效嗽鼻塞留留小寒噲噲微熱數日而歇重者頭痛體疼惡寒壯熱而膏腴之人肌膚脆弱雖不大觸冒其居處小有失宜則易傷於寒也自有四時節內忽有暴寒傷於人成病者亦名傷寒謂之時行傷寒非觸冒所致言此時通

行此氣故為時行也

時氣候

此謂四時之間忽有非節之氣傷人而成病也如春時應暖而寒夏時應熱而冷秋時應涼而熱冬時應寒而溫言此四時通行此氣一氣之至無間少長病皆相似故名為時氣也但言其病名風寒所傷則輕狀猶如傷寒小頭痛壯熱也若挾毒厲之氣則重壯熱煩毒或心腹脹滿多死也

瘧候

夫瘧病者由夏傷於暑客在皮膚至秋因勞動血氣腠理虛而風邪乘之動前暑熱正邪相擊陰陽交爭陽盛則執陰盛則寒陰陽更虛更盛故發寒熱陰陽相離則寒熱俱歇若邪動氣至交爭復發故瘧休作有時其發時節漸晏者此由邪客於風府邪循脊而下衛氣一日一夜常大會於風府其明

七

日日下一節故其作日晏其發日早者衛氣之行風府日下一節二十一日下至尾骶二十二日入脊內上注於伏衝之脈其行九日出於缺盆之內其氣既上故其病發更早其間日發者由邪氣內薄五臟橫連募原其道遠其氣深其行遲不能日作故間日作蓄積乃發凡病瘧多渴引飲飲不消乃變為癖大腸虛引飲水入腸胃則變為利也

婦人雜病諸候 四 凡五十論

霍亂候

陰陽清濁相干謂之氣亂氣亂在腸胃為霍亂也多因飲食過度冒觸風冷冷氣入於腹內脾氣得冷則不消水穀胃氣得冷則吐逆腸氣得冷則下利其心痛者先吐腹痛者先利心腹俱痛吐利並發其有頭痛壯熱而吐利者由體盛而挾風之氣搏之外與血氣交爭故頭痛發熱也內乘腸胃故霍亂吐利也

嘔吐候

胃氣逆則嘔吐胃為水穀之海其氣不調而有風冷乘之冷搏於胃氣胃氣逆則嘔吐也

孛子小兒注車船候

無問男子女人乘車船則心悶亂頭痛吐逆謂之注車注船特由質性自然非閑宿挾病也

與鬼交通候

人稟五行秀氣而生承五臟神氣而養若陰陽調和則臟腑強盛風邪鬼魅不能傷之若攝衛失節而血氣虛衰則風邪乘其虛鬼干其止然婦人與鬼交通者臟腑虛神守弱故思氣得病之也其狀不欲見人如有對忤獨言笑或時悲泣是脈來遲伏或如鳥啄皆邪物病也又脈來縣縣不知度數而顏色不變此亦病也

夢與鬼交通候

夫臟虛者喜夢婦人夢與鬼交亦由腑臟氣弱神守虛衰故乘虛因夢與鬼交通也

脚氣痛弱候

脚氣之病由人體虛溫濕風毒之氣先客於脚從下而上動於氣故名脚氣也江東嶺南上地卑下風濕之氣傷於人初得此病多不即覺或先無他疾而忽得之或因衆病後得之此病初其微飲食嬉戲氣力如故當觀察之其狀從膝至脚有不仁或若痺或淫淫如蟲行或微腫或酷冷或疼痛或緩縱不隨或有攣急或有至困能飲食或有不能食者或有見飲食而嘔吐者惡聞食臭者或有物如脂發於踠腸逆上衝心氣上者或有舉體轉筋者或壯熱頭痛者或心腎衝悸寢處不欲見明或腹內苦痛而兼下者或言語錯亂喜忘誤者或眼濁精神昏憤者此皆其證候也治之緩者便上入腹腹或腫胷膈滿上氣貴便死急者不全日緩者二三日也其病既入臟證皆相似但脉有二品若脉浮大而緩宜服續命湯

為石中下

二

兩劑若風盛者宜作越婢湯加朮四兩若脉轉駛而緊宜服竹瀝湯若脉微宜服風引湯二三劑其緊駛之脉是二品之最惡脉也脉浮大者病在外沈細者病在內皆當急治之治之緩慢則上氣便死也

脚氣腫滿候

溫濕風毒從脚而上故令四肢懈惰緩弱疼痺甚則上攻名脚氣而津液為風濕所折則津液不澀而蓄積成水內則浸漬臟腑外則流溢皮膚故令腠理脹密水氣積不散故腫也

淋候

淋腎虛而膀胱熱也膀胱與腎為表裏俱主水行於胞者為小便也腑臟不調為邪所乘腎虛則小便數膀胱熱則小便澀其狀小便痛疼澀數淋瀝不宣故謂之淋也

石淋候

淋而出石謂之石淋腎主水水結則化為石故腎客沙石腎為熱所乘則成淋腎虛則不能制石故淋而出石細者如麻如豆大者亦有結如皂莢核狀者發則燥痛悶絕石出乃歇胞轉候

胞轉之病由胞為熱所迫或忍小便俱令水氣還迫於胞屈辟不得充張外水應入不得入內洩應出不得出內外壅脹不通故為胞轉其狀小腹急痛不得小便甚者至死張仲景云婦人本肥盛豆舉自滿全羸瘦豆舉空減胞系了戾亦致胞轉

小便不利候

腎與膀胱為表裏俱主水水行小腸入胞為小便熱搏其藏熱氣蘊積水行則澀故小便不利也小便不通候

為第百十一

三

水行於小腸入胞為小便腎與膀胱俱主水此一經為臟腑若內生大熱熱氣入小腸及胞胞內熱故小便不通令小腹脹滿氣喘息也

大便不通候

三焦五臟不調和冷熱之氣結於腸胃津液竭燥大腸壅澀故大便不通張仲景云婦人經水過多亡津液者亦大便難也

大小便不利候

冷熱不調大小腸有遊氣壅在六小腸不得宣散蓄積結生熱故大小便澀不流利也

大小便不通候

腑臟不和榮衛不調陰陽不相通大小腸不結名曰閉格關格故大小便不通自有熱結於大腸則大便不通熱結於小

腸則小便不通今大小便不通者是大小二腸受客熱結聚則大小便不通此止客熱暴結非陰陽不通流故不痺閉格而直云六小便不通

遺尿候

腎與膀胱為表裏而俱主水腎氣通於陰而小便水液之下行者也腎虛冷冷氣入胞胞虛冷不能制小便故遺尿

小便數候

腎與膀胱為表裏俱主於水腎氣通於陰此一經虛而有熱乘之熱則小便澀虛則小便數熱澀數也

下利候

腸胃虛弱為風邪冷熱之氣所乘腸虛則泄故變為利也此下利是水穀利也熱色黃冷色白

帶利候

為第百十一

帶利由冷熱不調大腸虛冷熱氣客於腸間熱氣乘之則變赤冷氣乘之則變白冷熱相交則赤白相雜而連帶不止名曰為帶利也其狀白膿如涕而有血雜亦有少血者如白膿涕而有赤脈如魚腦又名魚腦利

血利候

熱乘血入於大腸為血利也血之隨氣外行經絡內通臟腑皆無滯積若冒觸勞動生於熱熱乘血散滲入大腸腸虛相化故血利也

陰痒候

婦人陰痒是蟲食所為一蟲九蟲在腸胃之間因臟虛蟲動作食於陰其蟲作勢微則痒重者乃痛

脫肛候

肛門大腸候也大腸虛冷其氣下衝者肛門反出亦有因產

用力勞傷氣衝其肛亦令反出也

陰腫候

陰腫者是虛損受風邪所為胞經虛而有風邪客之風氣乘於陰與血氣相搏令氣血不澀腠理壅閉不得泄越故令陰腫也

陰痛候

陰痛之病由胞絡傷損致臟虛受風邪而三蟲九蟲因虛氣作食陰則痛者其狀成瘡其風邪乘風氣衝擊而痛者無瘡但疼痛而已

陰瘡候

陰瘡者由三蟲九蟲動作侵食所為也諸蟲在入腸胃之間若腑臟調和血氣充實不能為害若勞傷經絡腸胃虛損則動作侵食於陰輕者或痒或痛重者生瘡也診其少陰之脈

為有蟲十九

五

滑而數者陰中生瘡也

陰挺出下脫候

胞絡傷損子臟虛冷氣下衝則令陰挺出謂之下脫亦有因淫而用力偃氣而陰下脫者診其少陰脈浮動浮則為虛動則為悸故令下脫也

陰冷候

胞絡勞傷子臟虛損風冷客之冷乘於陰故令冷也

陰中生息肉候

此由胞絡虛損冷熱不調風邪客之邪氣乘於陰搏於血氣變而生息肉也其狀如鼠乳

瘡候

此或因帶下或舉重或因產時用力損於胞門損於子臟陽下乘而成瘡

痔病候

痔病由勞傷經絡而血流滲之所成也而有五種肛邊生瘡如鼠乳出在外時出膿血者牡痔也肛邊腫生瘡而出血者牝痔也肛邊生瘡痒而復痛者為血脈痔也肛邊腫核痛發寒熱而出血者腸痔也因便而清血出者血痔也

寸白候

寸白是九蟲內之一蟲也凡九蟲在人腹內居腸胃之間腑臟氣實則蟲不動不為人害虛者蟲便發動滋長乃至斃人又云飲白酒以桑枝貫牛肉食生栗生魚仍飲乳酪能變生寸白者也

陰臭候

陰臭由子臟有寒寒搏於津液蘊積氣衝於陰故變臭也

尿血候

血性得寒則凝得熱則流散若勞傷經絡其血虛熱滲入胞故尿血也

大便血候

勞傷經脈則生熱熱乘於血血得熱則流散滲入於大腸故大便血也

失精候

腎與膀胱合而腎藏精若勞動膀胱傷損腎氣則表裏俱虛不收制於精故失精也

乳腫候

足陽明之經胃之脈也其直者從缺盆下於乳因勞動則足腠理虛受風邪入於榮衛榮衛否澀血氣不流熱結於乳故令乳腫其結腫不散則成難

始乳候



此由新產後兒未能飲之乃飲不泄或斷兒乳捻其乳汁不盡皆令乳汁蓄結與血氣相搏即壯熱大渴引飲牢強掣痛手不得近是也初覺便以手助捻去其汁并令傍人助啣引之不爾成瘡有膿其熱勢盛則成癰

### 乳癰候

腫結皮薄以澤是癰也足陽明之經脈有從缺盆下於乳者勞傷血氣其脈虛腠理虛寒客於經絡寒搏於血則血澀不通其血又歸之氣積不散故結聚成癰者癰氣不宣與血相搏則生熱熱盛乘於血血化成膿亦有因乳汁蓄結與血相搏蘊積生熱結聚而成乳癰年四十已還治之多愈年五十已上慎不當治之多死不治自當終年又懷娠發乳癰腫及體結癰此無害也兼懷胎之癰病起陽明陽明胃之脈也主肌肉不傷藏故無害診其右手關上脈沈則為陰虛者則病

乳癰乳癰久不瘥因變為癩

養生方云熟食汗出露乳傷風喜發乳腫名吹乳因喜作癰

### 發乳潰後候

此謂癰疽發於乳膿潰之後或虛癢或疼痛或渴也凡發乳潰後出膿血多則腑臟虛燥則渴而引飲飲入腸胃腸胃虛則變下利也

### 乳瘡候

此謂膚腠理虛有風濕之氣乘虛客之與血氣相搏而熱加之則生瘡也

### 疽發乳候

腫而皮強上如牛領之皮謂之疽也足陽明之脈有從缺盆下於乳者其脈虛則腠理開寒氣客之寒搏於血則血澀不通故結腫而氣又歸之熱氣厚盛故成疽也熱久不散則內

敗為膿也

乳結核候

足陽明之經脈有從缺盆下於乳者其經虛風冷乘之冷折於血則結腫夫腫熱則變敗為膿冷則核不消又重疲勞動氣而生熱亦焮焯其湯熨針石別有正方補養宜導今附於後

養生方云踞以兩手從曲脚內入據地曲脚加其上舉尻其可用行氣愈瘰癧乳痛交兩脚以兩手從曲脚極掙舉十二通愈瘰癧乳痛也

石癰候

石癰之狀微強不甚大不赤微痛熱熱自歇是足陽明之脈有下於乳者其經虛為風寒氣客之則血澀結成癰腫而寒多熱少者則無大熱但結核如石謂之石癰

發背候

五臟不調則致疽疽者腫結皮強如牛領之皮六腑不和則致癰癰者腫結薄以澤是也腑與臟為表裏其經脈循行於身俞皆在背腑臟不調和而腠理開受於風寒折於血則結聚成腫深則為疽淺乃為癰隨寒所客之處血則否澀不通熱又加之故成癰疽發背也

改訾候

此為內癰發於脅名為改訾由邪氣聚在下管與經絡血氣相搏所生也至其變敗狀如癰疽

發乳後渴候

此謂發乳膿潰之後血氣虛竭腑臟焦燥故令渴也渴引飲不止飲入腸胃則變為下利也

發乳下利候

此謂發乳而腸胃虛受冷則下利也。大腸為金，水穀之道，胃為土，水穀之海也。金土子母，而足陽明為胃之經，其脈有從缺盆下於乳者，因勞傷其脈虛，而受風寒，風寒搏血氣，血否澀不通，故結癰腫，腫結皮薄以澤者為癰，而風氣乘虛入胃，則水穀糟粕變敗不結聚，腸虛則泄為利。金土子母俱虛，故發乳而復利也。又發乳渴引飲多亦變利也。

發乳久不瘥候

此謂發乳癰而有冷氣乘之，故癰疽結經久不消不潰而為冷所客，則膿汁出不盡而久不瘥。

發乳餘核不消候

此謂發乳之後餘熱未盡而有冷氣乘之，故餘核不消復遇熱蘊積為膿，亦有淋瀝不瘥而變為癰也。

發乳癰候

此謂因發癰瘡而膿汁未盡，其瘡暴瘥則惡汁內食後更發，則成癰者也。

重刊巢氏諸病源候總論卷之四十





